

四庫全書

史部

欽定四庫全書

弇山堂別集卷十四

明 王世貞 撰

異典述九

天子賜名

高帝時靖江王鐵柱賜名煒再賜名守謙鄧衛公友德
賜名愈李曹公保兒賜名文忠楊左丞冕賜名憲陳御
史大夫亮賜名寧江陰吳侯初為指揮名國興賜名良

魏國公徐允恭既嗣爵賜名輝祖及諸弟增壽添福膺
緒皆賜名又賜署令汪名文蹇忠定初名瑤帝親書義
字賜之齊尚書初名德賜名泰鐵尚書鉉以都督斷事
奏對稱旨上為字之曰鼎有胡文穆初名廣建文君易
之曰靖後文皇命仍故名永樂時楊文敏子榮入閣上
為改之曰榮故魏國公徐輝祖子釋迦保襲爵特賜名
欽李狀元初名馬開榜日上親書其字於旁遂名騏河
南護衛軍俺丁三發周王反謀陞錦衣指揮僉事賜姓

名趙誠洪熙元年賜魏國公徐長孫名顯宗夏太常祀
既第入中秘宣廟一日視其名曰日可從旁乎改置上
曰景王毅愍初名強改賜曰文沐黔公初名儼改賜曰
斌成化中有邊患上改布政使胡德勝名曰德盛會昌
侯孫鎮以名犯英廟諱上為改曰銘世宗朝少傅張文
忠璉以嫌名請上為改曰孚敬仍賜字曰茂恭恭誠伯
陶仲文上為字曰載道賜號曰林隱又曰凌虛子

賜國姓

太祖有義子數人如李曹國文忠沐西平英都督何文

輝徐司馬及元帥文剛文遜等皆賜朱姓正德五年義

子武德

一姓裴

七年都督錢寧錢安許國賜朱姓又賜都

督朱福朱剛都指揮朱謙朱春朱翥朱增朱斌朱政朱

海朱岳朱昇朱晟朱彪朱鏞朱鈺指揮朱欽等千百戶

鎮撫旗舍朱欽等百二十人姓十二年賜舍人朱山朱

準朱容朱淮朱渭朱義朱大爵朱印朱珂姓俱錦衣衛

食糧尋詔都督江彬許泰劉暉張洪神周李琮指揮焦

睿俱賜朱姓又改指揮楊瑄曰璋焦椿曰棕桂曰松張
天祐曰海廷鸞曰壁馬定曰靖俱賜朱姓

賜降將姓名

賜降將姓名忠勤伯綽羅曰李賢同安侯浩里浩沁曰
和珍順義伯阿爾噶實哩曰羅秉忠恭順伯巴圖特穆
爾曰吳允誠忠勇王額森托噶曰金忠安順侯托和齊
曰薛貴永順伯托歡曰薛斌清平侯瑪嚕曰吳成忠勇
伯巴爾台曰蔣信子伊爾必斯曰蔣善恭順侯伊勒都特

穆爾曰吳克忠都督都指揮指揮等官默色特穆爾曰王
麒旺扎勒特穆爾曰吳良婁多爾輝曰柴東誠布敦罕曰
吳守義綽倫台曰夏貴北斗曰戚斌觀音保曰李觀巴珠
曰楊効誠多爾濟曰馬惟良特珠曰柴克恭瑪勒蘇爾呼
曰柴志誠托克托博囉曰脫順又托克托博囉曰和愛阿
爾拉卜台曰楊汝誠拜特穆爾曰柴志敬孟克曰安汝敬
托克托曰楊必敬濟蘭曰吳克誠多羅干曰吳存敬科爾
羅額琳沁曰羅秉忠和實固曰韓以謙博多納曰白忠阿

德鴈曰王義阿爾特穆爾曰穆義丹珠卜壘曰丁順李
伯嘉努曰李安祖準布哈曰柴永謙額哩葉博囉曰高
禮納哈齊曰莫清巴圖曰趙忠美博順特穆爾曰
宋一誠哈喇勒敦曰張隆善延扎布哈曰王懋忠薩喇
圖曰劉允信實嘉努曰李顯忠贊布曰張志義阿喇實
曰李從善哈尼曰郭以誠庫珠特穆爾曰柴永正達策曰
安汝堅博迪曰平以正密納舍嘉曰安思謙鴈滿岱曰王
存禮阿圖哩曰白瑜齊齊克曰陳守忠必呼默赫呼默曰馬克

順布延達賚曰于忠諾海曰海榮五十六曰陸忠楚楚
曰田義和遜曰王彪海罕曰陳玄伯嘉魯曰白毅曰鄂
特實曰姚智德都曰郭美伊實納克曰芮剛策珠爾曰
朱採托和齊曰朱靜幹齊爾曰朱滿呼圖克曰朱恩博
多勒罕曰朱窺又編修和爾齊曰霍丘

賜免死詔

文臣非封侯伯給券而有身免二死或一死詔者太宗
於光祿卿張泌仁宗於光祿少卿李灝此可據者也灝

免三死內臣如金英范弘輩俱有之據小說云蹇夏二楊皆有賜不可攷矣

親撰祭文

高皇帝諭祭羣臣文多出御筆或有所感觸即為之然不以示恩禮也若繼體之世有之則曠特矣嘉靖中上為少保禮部席尚書書太子太保兵部李尚書承勛親御翰墨作祭文皆極諄懇示不及入相及拜太宰意

賜羣臣詩

高帝聖質天縱其賜羣臣詩文不以貴近觸意即發多不可紀若承平之世人主所賜內閣元老及禁林侍臣亦多若尤異而可紀者宣宗賜少傳工部尚書兼謹身殿大學士楊榮詩武夷巍峩青挿天丹山碧水相連延扶輿旁礴之所產往昔奮起多名賢漢清白吏有遠孫只合繼續揚華芬夙承清德席門緒明經策第多詞垣皇祖承天御天下竭職論思靡餘暇懷忠秉誠履堅貞臨事果達智識明禁中頗牧才卓犖風雲

驥足千里輕顧予菲德忝嗣位旰食宵衣急圖治普天
之下率土之濱安危休戚翳余一人大厦之興藉梁棟
為邦必資輔弼重卿事太宗兼仁考歷年固多身未老
方茲倚重傳與保士有大抱負堯舜其君民勗哉弼違
補闕輔吾仁齊芳昔賢輝千春世宗賜少師太子太師
吏部尚書謹身殿大學士費宏古昔聖王撫方夏必資
賢哲為股肱君臣上下俱一德庶政惟和洪業成顧余
眇末德寡昧欽承眷命歷數膺宵旰兢兢勉圖治日御

經幄延儒英每從古訓尋治理歌詠研磨陶性情詩成
朕意或未愜中侍傳宣出紫清補袞卿作仲山甫為朕
藻潤皆精明睠茲忠良一以賴舜臯彷彿康哉賡朕所
望者獨卿重廟堂論道迓熙平虞廷盛治須百揆商諮
伊傅周兩卿朕纘大服履昌運天休滋至卿其承帝賚
良弼匡吾政協恭左右待鈞衡大旱須卿作霖雨淫潦
亦賴旋開晴沃心輔德期匪懈未讓前賢專令名右皆
七言歌行又賜少師太子太傅吏部尚書武英殿大學

士楊一清邇年西陲擾起卿督邊方三辭乃承命開心
副予望才兼文與武內外資安攘寬朕西顧憂遂使吾
民康公勤既昭著夙名滿華羌勅使往宣召復來坐巖
廊黃扉典政本摠誠以匡襄余奉祖宗緒志欲宣重光
深恐德弗類倚毘賴卿良展其平生志佐朕張皇綱股
肱職補衮伊周並昭彰助成嘉靖治青史常流芳又賜
太子太保吏部尚書武英殿大學士石珤黃閣古政府
輔導須才良朕自即阼始求賢日皇皇卿以廷薦入性

資特剛方在木類松栢在玉如珪璋可否每獻替忠實
無他腸聖學朕所勉煥乎慕堯章幾暇有著作忠懷庶
宣揚賴卿善補袞繪繡衣與裳竭誠乃賡載彩鳳鳴高
岡化成在人文熙皞期虞唐地天既交泰民物咸平康
述此酬卿勞盛事傳無疆賜太子太保禮部尚書武英
殿大學士賈詠殿廷暑氣薄薰風灑然生萬幾有清暇
書史陶吾情日與聖賢伍外誘難相嬰對時或感物興
到句還成豁然融心性豈止諧音聲資卿為藻潤朕志

益開明卿本中州俊簡在登台衡君臣際良難所貴德
業并詩章本餘事治理須持平朕固諒卿志夙夜懷忠
貞喜起協舜樂交修和商羹卷阿有遺響終聽鳳凰鳴
又永樂五年授交趾明經甘潤祖等十一人為諒江等
府同知賜勅慰勉仍賦詩一章各送之宣德五年命行
在工部左侍郎許廓巡撫河南仍賜之詩曰河南百州
縣七郡所分治前歲農事缺始旱澇復繼衣食既無資
民生曷由遂顧予位民上日夕懷憂愧爾有敦厚資其

往勤撫字徙者必綏輯饑者必賑濟咨詢必周歷毋憚躬勞勩虛文徒瑣碎所至見實惠勉旃罄乃誠庶用副予意又命陽武侯薛祿等率師築赤城等處賜之詩有出車命南仲城齊維山甫句祿不曉南仲山甫以問少傅楊士奇具言之且曰上以古之賢將待爾也祿乃拊心感泣又肅廟以禮部尚書席書病目賜詩問之期以弼亮以刑部尚書趙鑑致仕賜詩送之嘉其止足皆龍箋御墨天書煥爛真傳家之至寶耀世之盛事也又宣

宗賜太醫院使徐叔拱省墓雲間秀毓人中英襟懷磊
落水壺清羣書博覽析理明青囊金匱尤研精濟人利
物心秉誠江南江北馳芳聲我冠博帶屬老成輶車應
召來我京醫人醫國咸見稱回生起死知通靈掄材特
授官品榮蒼顏皓首延遐齡錫爾鳳誥彰爾能追封仍
顯爾所生竭來孝思攄衷情懇告祭奠歸先塋朔風獵
獵征帆輕長江萬里煙波平故鄉晝錦光熒熒壺觴親
舊歡相迎私恩公義當並行北轅宜早登回程兩全忠孝

惟在卿汗簡千載留清名又賜還鄉太醫老卿八十
餘胸蟠千古岐黃書鬢含白雪面紅玉長紆錦綬鳴璫
琚光華近侍今三朝致恭和保功業高五花鸞誥寵先
世南望飛雲心孔勞歸榮遂爾追遠情吳淞江水清泠
泠春風花開景明麗待爾重來朝闕廷

右叔拱以供奉庶僚得此其獎予期注之隆有公卿
大臣所不敢望者叔拱歸鄉時天子賜二宮人二小
璫使扶侍朝夕後從葬於墓所尤為異典余與叔拱

之後益孫善出家乘見示後攷之宣廟御集邑志皆合因錄於此

勝國臣特旌

自古忠臣殉國亦有幸見旌於新朝者如堯君素劉仁
贍之類要亦創業之主欲以風厲後代偶一為之而已
然未有我明之於御史大夫福壽者高帝下建業福壽
以城破戰歿非若君素仁贍之百折不撓也高帝畧其
吠堯錫以崇祠著之祀典與開國元勛並列其平章政

事與衛國公之位號忠肅之謚一仍元舊不少貶損有子陳龔福仕為中書宣使遷海州同知坐法當戍邊上曰是福壽子忠臣之後耶宥之擢為太僕少卿賜鈔百錠後二年擢兩浙都轉運鹽使復坐為宣使時與胡丞相黨事既坐減戍雲南矣上復曰此故元忠臣子改命於西平侯沐英處聽用仍勅侯善遇之噫可謂幸矣彼強通額森特穆爾陳友定者獨非忠臣也耶上自取江東以至即位每遣使賞幣問候元大將庫庫特穆爾即

王巴拜輒被留後雖定天下而巴拜遁沙漠數犯邊上
猶冊其妹為秦王妃冊文稱太傅中書右丞相河南王
巴拜之妹洪武八年巴拜卒始冊衛國公鄧愈女為次
妃

賞功異典

國朝大功無過於取元都定中原而立功之臣無過魏
公達鄂公遇春然前賞止白金五百兩文幣十表裏後
賞止文幣一百表裏而已豈其時庫藏尚未充足耶獨

二十一年捕魚兒海之捷大將軍永昌侯王賞銀二千兩文綺五十疋鈔一千錠左叅將定遠侯王弼白金一千兩鈔八百錠文綺四十疋左右副將軍延安侯唐勝宗武定侯郭英白金各一千兩鈔四百錠文綺三十疋右叅將都督孫恪白金五百兩鈔三百錠文綺十五疋乃至部卒以獲寶功百戶池裕賞黃金一百兩白金三百兩綵段六表裏總旗施文等各賞黃金一百兩綵段二表裏各進官四級二十二年平九溪諸峒擒賊首夏

得忠功靖寧侯葉昇賜黃金二百兩白金三千兩鈔一
千錠文綺三十疋普定侯陳桓東川侯胡海等次之九
溪之功又下於捕魚兒海矣而賞若此所不可曉也

初平安南英國公張輔賜冠服白金四百兩鈔一千錠
綵幣四十表裏黔國公沐晟冠服白金鈔同幣殺其二
豐城侯李彬等有差再下安南功張輔沐晟各賜白金
五百兩鈔二萬錠綵幣五十表裏正德五年太監張永
以平安化發劉瑾功賞白金五百兩綵幣三十表裏此

繼世以後賞功之極盛者也

國朝黃金不以賞功而自葉昇池裕外正統中三殿工
完賞太監阮安曾保各金五十兩銀一百兩綵段八表
裏鈔一萬貫景泰中以叅將楊俊獲喜寧功并總兵官
朱謙各賞金三十兩銀六十兩加賞俊金二十兩銀三
十兩綵幣三表裏又以立東宮賞大學士陳循高穀江
淵蕭鎡商輅各黃金五十兩賜黃金凡五見

勛臣歸鄉賞賜

洪武二十一年信國公湯和還鄉賜黃金三百兩白金
二千兩鈔三千錠綵段四十表裏又賜其夫人胡氏黃
金二百兩白金一千兩鈔五百錠綵段三十表裏二十
三年魏國公徐輝祖開國公常昇曹國公李景隆宋國
公馮勝申國公鄧鎮賴國公傅友德還鄉各賜黃金三
百兩白金二千兩鈔三千錠文綺三十疋綾十疋明年
涼國公藍玉賜如之加鈔五百錠江夏長興永平南雄
崇山懷遠鳳翔定遠安慶武定鞏昌鶴慶東川靖寧宣

寧普定景川諸侯俱黃金二百兩白金二千兩鈔千錠
文綺三十疋西平侯沐英來朝賜黃金二百兩白金五
千兩鈔五千錠文綺一百疋按鈔一錠為五貫貫直白
金一兩五千錠則為白金二萬五千兩

賞告密功

洪武太原衛軍林旺韓五兒以發劉原利叛陞百戶各
賞白金三斤文綺帛十六疋千戶張豫發莊成黨逆賞
白金二百兩鈔四百錠衣一襲良馬金帶一陞陝西都

指揮加賞白金二百兩鈔二百錠綵段十表裏牛馬各
六永樂總旗靖西京驢告叛陞百戶賞白金各五十兩鈔
百錠綵幣二表裏衣一襲寧夏都指揮韓誠預言叛寇
謀賞鈔三百錠羊十羴酒五十瓶百戶王釵發歷城侯
盛庸罪陞指揮同知賞銀一百兩鈔四百錠都督許成
發譚深趙曦謀殺梅殷封永新伯其後御史李濬告漢
王反不過轉僉都御史而蕭淮等發寧王謀僅一轉光
祿少卿又不足言矣

軍民一事之賞

高帝不測之賞雖戍卒田父一善所不遺如民人王升遺書誨其子平涼知縣瑱以廉儉事聞赦瑱它罪賜白金百兩川椒附子各五斤仍賜勅獎諭蓋以升家書要二藥令其起稅寄來故也又以軍人王二隨征獲馬入官賞白金百五十兩鈔五十錠民蔣公闕王剛甫獲蘭秀山盜各賞白金一百二十兩黃再文獲長陽盜賞白金一百五十兩珠展布哈執偽右丞雅克哈雅賞白金三百

兩

尚師之賞

永樂初尚師哈里瑪初見賜黃金百兩白金千五百兩
鈔二萬貫綵幣四十五表裏及法器裯褥鞍馬香果米
茶等物徒衆白金綵幣靈谷寺為高皇帝后資福事竣
賜黃金百兩白金千兩鈔二千錠綵幣百二十表裏馬
九匹灌頂大國師哈斯博囉等各白金二百兩鈔二百
錠綵幣十馬三匹五臺山為仁孝皇后資福事竣賜白

金一千兩綵紗羅絹布二百六十疋

真人之賞

嘉靖前後賜真人陶仲文銀十餘萬兩大紅金綵繡織
蟒龍斗牛雲鶴麒麟飛魚孔雀段羅紗絹無慮數百襲
獅蠻玉帶白玉帶五圍金帶一圍玉印二金嵌寶冠渾
金冠纍絲冠如意七寶簪金嵌寶石金銀水盂金盤銀
盤各十餘副

諸降人重賞

諸降人之賞無重於洪武之納克楚永樂之金忠者納
克楚封海西侯賜玉帶一金鑲香帶一白金一千兩文
綺帛各四十疋鈔一千貫又加賜文綺帛各十疋白金
二百五十兩錦衣一襲妻子衣靴襪線米五百石宗王
平章國公衆通等十人各文綺帛二疋銀二十五兩諸
部將金帶一百花素銀帶七百紗帽八百銀鈔有差又
發鈔三十萬錠織金文綺二千疋布十七萬六千七百
十六疋綿襖二萬七千五百五十二領冬衣及色絹衣

三萬二千二百四十襲額森托噶即金忠封忠勇王賜
金印朝服公服玉帶織金文綺衣黃金一百兩白金四
百兩鈔二千錠紵絲五十表裏紗羅綾各二十疋鞍馬
二匹副牛百頭羊百頭居第牀褥器用薪芻咸備別賜
妻黃金五十兩白金百兩紵絲二十表裏紗羅綾各十
疋鈔一千錠冠服一副女衣一襲其甥都督巴圖罕并
都指揮綽班等八員各白金五十兩鈔七百錠織金文
綺衣一襲紵絲六表裏棉布三十疋指揮布達特穆爾

等三十一員各白金三十兩鈔五百錠織金文綺衣一襲紵絲五表裏棉布二十五疋千戶恩克托羅爾等十八員各白金二十兩鈔四百錠織金文綺衣一襲紵絲四表裏棉布二十疋百戶所鎮撫格根特穆爾二十五員各白金十五兩織金文綺衣一襲紵絲三表裏棉布十五疋冠帶鞍馬牛羊薪芻居室器皿照等第給賜

北人之賞

賜北人之厚無過於正統時衛拉特布哈王太師額森者

蓋其時敵勢方盛故也按四年賜托克托布哈王汗者織金四爪蟒龍膝襪八寶衣一織金胸背麒麟青紅綵段六五色段八絹二十五金嵌寶石絨氈帽一頂金釵大鵬厭纓事件全伽藍香間珊瑚帽珠一串寶金綵繡紵絲衣六金繡纏身蟒龍直領一青暗花卉口對襟曳撒一織金冑背麒麟并四寶四季花褡褳比甲各一織金虎并圈金寶相花雲肩通袖膝襪各一金相犀甲麒麟繫腰一紅甸皮描金花包二鍍銀摺鐵刀并鞘一銅線

虎尾三尖雲頭套靴一雙秋水面烏木裏琵琶一花梨
木哈必蘇一鞭鼓喇吧號笛各一黃身勇字魚肚旗一
魚尾號帶飛虎招旗二妃及丞相知院大夫以下各有
差賜淮王額森與汗同自是歲歲有加十四年又賜汗
織金蟒龍文綺綵絹一百八十四疋金銀各五錠塔納
珠一千六百顆金銀鑲木碗各二織金九龍蟒龍渾金
文綺三十八疋繡金衣五件靴襪樂器帳房藥材等物
可汗二妃織金文綺綵絹三十二疋各錦袍一襲織金

衣三件靴襪針線脂粉絲絨具全賜額森亦如之未幾而有土木之變尚賜可汗及額森各金百兩銀二百兩大珠十塔納珠百顆織衣九龍紵絲五疋織金蟒龍紵絲五疋織金冒背紵絲十疋渾織金花紵絲五疋素花紵絲二十疋并琵琶箏胡琴器皿等物未幾太上還而汗為額森所滅賞却從薄矣

戎王來朝之賞

永樂破安南之後西南夷王來朝者凡四五見國家亦

以其近世希曠禮賜優渥蓋有令甲所不載者按永樂
六年淳泥國王麻邪惹加那乃來朝賜王儀仗交椅水
罐水盆俱用銀傘扇俱銷金白羅金裝鞍馬二疋織金
文綺紗羅綾絹衣十襲王妃弟妹陪臣各有差王尋病
卒棺殮皆資尚方葬安德門外親為樹碑賜其子嗣王
遐旺金鑲玉帶一金百兩銀三千兩及錢鈔錦綺紗羅
衾褥帳幔器皿王母以下有差十一年遐旺來朝賜黃
金百兩白金五百兩鈔三千錠錢百五十萬文錦四段

綺帛紗羅八十疋金織錦繡文綺衣各一襲并器皿衾褥帷幔等物王母及叔以下有差又九年滿刺加國王拜里迷蘇刺來朝賜金龍衣二襲麒麟衣一襲及金銀器皿帷幔褥朝辭賜金鑲玉帶一儀仗一副鞍馬二匹黃金百兩白金五百兩鈔四十萬貫銅錢二百六十七萬錦繡紗羅三百疋絹千疋渾金文綺二織金通袖膝襪二王妃冠服一副白金二百兩鈔五千貫錦綺紗羅絹六十疋織金文綺紗羅衣四襲王子姪陪臣賜各有


差十五年蘇祿國東王巴都葛哈叭答刺西王麻哈刺吒
葛刺麻丁峒王叭都葛巴刺卜來朝各賜金鑲玉帶一
黃金百兩白金三千兩羅錦文綺二百疋絹三百疋鈔
一萬錠錢三百萬文金繡蟒龍文綺麒麟衣各一襲隨
從頭目賜各有差東王卒德州賜葬立碑留其妃及弟
守墓三年乃歸十九年古麻刺朗國王幹刺義亦敦奔
來朝賜如蘇祿東王其年還至福州卒賜葬亦如東王
夷王賞功之優

永樂三年以日本國王源道義捕倭寇獻俘賜九章冕服鈔五千錠錢一百五十萬織金文綺紗羅絹三百七十八疋明年又賜白金千兩織金諸色綵幣二百疋綺繡衣六十件銀茶壺三執銀盆及綺繡紗帳衾褥枕席器皿諸物海舟一艘又賜白金千兩錢一千五百萬錦紵絲紗羅絹四百十三疋僧衣十二襲帷帳衾褥器皿若干事王妃白金二百五十兩錢五百萬錦紵絲紗羅絹八十四疋四年占城請夾攻安南賜鍍金銀印紗帽

金帶黃金百兩白金五百兩金織文綺衣二襲錦綺紗
羅有差六年以夾攻安南功賜金印黃金百兩白金五
百兩錦綺紗羅五十疋綵絹百疋四年以朝鮮世子李
禋朝賜御製詩白金錦綺書籍其王芳遠白金千兩絨
錦綺羅百二十疋十五年以獻馬功賜勅及白金二千
兩文綺表裏二百疋紗羅絨錦五十疋馬二十四匹妃
文綺表裏八十疋

賜百官食

洪武中視朝畢上御奉天門或華蓋殿武英等殿公侯
一品官侍坐門內二品至四品及翰林院坐門外五品
以下官於丹墀內贊拜叩頭就坐光祿司進膳各設饌
食畢叩頭而退日以為常二十八年始罷之



弇山堂別集卷十四

欽定四庫全書

史部

弁山堂別集卷十七

五至

詳校官編修_臣李潢

編修_臣裴謙覆勘

總校官中書_臣朱鈐

校對官中書_臣李棨

謄錄監生_臣俞成鯨

欽定四庫全書

弇山堂別集卷十五

明 王世貞 撰

異典述十

致仕降級

永樂初吏部尚書張統戶部尚書王鈍以中奉大夫左布政使致仕降一級然賜獎諭非從斥典或亦不絕其祿耳

勛臣奪公孤

永樂曹國公李景隆以罪奪特進左柱國太子太師以
公歸第宣德成山侯王通奪太子太保及侯下獄降為
都督僉事正統寧陽侯陳懋以劾奪太保尋復景泰加
兼太子太師天順復辭兼職同時辭太子太師者武清
侯石亨尋進封忠國公辭太子太保者都督張輓尋進
封文安伯安遠侯柳溥以劾奪太傅弘治平江伯陳銳
奪太保太子太傅正德惠安伯張偉奪太保及伯下獄

復爵至嘉靖加太子太傅伏羌伯毛銳奪太子太傅後
亦復嘉靖昌國公張鶴齡奪太師及公以南京錦衣衛
都指揮閒住武定侯郭勛奪太保太子太傅後復進至
太師太子太師翊國公尋下獄奪官死恭誠伯陶仲文
辭所兼少師少傅少保王田伯蔣輪以不敬奪太子太
保咸寧侯仇鸞自甘肅逮還赦之落太子太保起鎮大
同復

孤卿左削

景泰中戶部尚書金濂落太子太保為工部尚書尋復
天順初禮部尚書胡濙吏部尚書王直落少傅太子太
師謹身殿大學士高穀落少保太子太傅尋致仕吏部
尚書王翱落太子太保尋加太子少保後復故兵部尚
書石璞落太子太保為南院左都御史兵部左侍郎俞
綱落太子少保都察院左都御史蕭維禎右都御史羅
通落太子少保仍故官成化吏部尚書李秉落太子少
保致仕兵部尚書余子俊落太子太保為左都御史仍

致仕後復太保尚書南京兵部尚書王恕落太子少保
致仕弘治起為吏部尚書加太子太保吏部尚書尹旻
落太子太傅為太子少保尋落少保致仕戶部尚書劉
昭落太子少保致仕正德太子少保文淵閣大學士曹
元併落尚書嘉靖中大學士桂萼落少保太子太傅致
仕尋復吏部尚書歐陽必進落少保太子太保尋致仕
禮部尚書兼學士溫仁和被論落太子少保刑部尚書
聞淵落太子少保尋加太子太保為吏部尚書少師大

學士高拱削官職閒住刑部尚書潘季馴削太子少保
為民後起右都御史仍落官保其致仕後削官者正德
中大學士劉健大學士焦芳俱落少師太子少師大學
士謝遷劉宇俱落少傅太子太傅大學士楊廷和蔣冕
毛紀尚書喬宇彭澤盡落其少師少傅少保并尚書大
學士銜嘉靖中大學士賈詠以迎駕誤朝落少保太子
太保後年至八十復之工部尚書朱衡以山陵事落太
子太保太子太保禮部尚書潘晟起兼武英殿大學士

尋致仕再削官閒住太子少保兵部尚書凌雲翼亦落
官保尚書閒住其累降累復者嘉靖特進光祿大夫上
柱國少師太子少師禮部尚書武英殿大學士夏言致
仕至灣召入落階勛及少師太子太師為少傅太子太
傅尋悉復之進吏部尚書華蓋殿大學士復賜歸未行
落少師華蓋殿為少傅太子太師禮部尚書武英殿大
學士滿九載悉復之仍落階勛官職閒住久之以禮部
尚書武英殿大學士致仕召用仍悉復故官再落階勛

師殿銜以吏部尚書致仕逮下獄論死後復故官

死後追削生前公孤宮秩

嘉靖八年以謬議大禮追削毛澄太子太傅林俊太子太保萬曆十一年以執政怙肆追削張居正太師兼太子太師

死後削公孤贈及諡

太子太保工部尚書李鏊贈太保諡恭敏以行履不稱且大學士楊一清私與削太子少保禮部尚書贈太子

太保謚榮簡盛端明太子太保禮部尚書贈少保謚榮
僖顧可學禮部尚書贈少師謚文康榮靖邵元節恭誠
伯謚榮康惠肅陶仲文俱以隆慶初元削張居正上柱
國以萬曆十年削其削文忠謚以十一年

訪仙進秩

永樂中胡忠安公濙以訪仙人張三丰不值由都諫超
為少宗伯嘉靖中王大任姜儼以訪仙及符篆秘方超
為侍讀學士其後榮悴之頓殊者忠安蓋別有托也

中貴歲米

中貴人雖尊重用事而太監品不過正四計日止廩米升半及衣帽鞞料而已高帝時既定監局職名後中書省請量增歲祿至十二石不許其後有以軍功加者如曹吉祥劉永誠之類蓋以十二石為一級也然多不過三十六石而止惟成化中御馬監太監汪直初以緝事功加歲米二十四石又以軍功加三十六石以威寧海功加四十八石以黑石崖功加三百石後累至四百八十

石正德中司禮監太監張永初以恩加歲米十二石以
平寧夏逆瑾功加四十八石以獲妖人功加一百二十
石後累至三百餘石東廠太監張忠以獲妖賊功加歲
米二百二十石前後緝賊及應州等功亦累至三百餘
石大約米至七十二石則當為正一品而僣從衣料亦
累增益不可勝計蓋又王振劉瑾之所無也嘉靖司禮
太監張佐累加至二百四十二石麥福加至三百七十
石黃錦加至五百餘石

三廠

永樂十八年立東廠命內官一人主撥錦衣衛官校刺
訶大小事情成化十二年增立西廠命御馬監太監汪
直主之權出東廠上正德三年東廠有太監丘聚西廠
太監谷大用矣復以榮府舊倉地為內行廠司禮太監
劉瑾自領之得訶察一切及二廠不法事

中貴家屬勛封

昭武伯曹欽司禮監太監吉祥從子為後者也亦自以

戰功從吉祥奪門封後誅成化寧晉伯劉聚御馬監太
監永誠從子為後者也從永誠積戰功至左都督自以
破西虜功封襲正德中泰安伯張富司禮監太監永兄
也定安伯容永兄也高平伯谷大寬提督團營太監大
用兄也永清伯大亮大用弟也鎮安伯魏英司禮監太
監彬弟也平涼伯馬山提督東廠太監永成姪也鎮平
伯陸永監鎗太監閻姪也皆冒永等恩澤封後俱革馬
山雖貴衣蟒圍玉為永成汲水澆花調馬於庭他亦往

往類是

內臣封父

太監四品其官又不可以封其父者或推恩其兄弟至都督等官因而貤及耳正德初谷大用之父奉張永之父友特封錦衣衛指揮使丘聚魏彬馬永成之父贈如之明年奉友俱進都督同知劉瑾緣以贈三代皆為都督同知而後遂為故典矣

中貴與實錄恩

嘉靖五年六月大學士費宏等言皇考實錄成其於
聖謨睿德紀載頗為詳實然臣等不敢自以為功也蓋
累朝實錄皆有章奏可據若今獻皇帝三十餘年事臣
等所賴以考據者則有司禮監太監張佐黃英戴永原
編實錄一冊載獻皇睿制序文及各年章奏為詳功當
首論後又得司設太監楊保陳清錦衣正千戶翟裕陸
松所纂之助功當併論有旨佐蔭弟姪指揮僉事黃英
戴永俱正千戶楊保百戶陳清總旗俱錦衣衛世襲翟

裕陸松陞指揮僉事

內臣賜祠

天順初復司禮監太監王振官立祠賜額曰旌忠成化
初賜御馬監太監劉永誠特祠額曰褒功成化初賜司
禮監太監懷恩特祠額曰顯忠史言恩之後有覃昌其
賢亦相等自是請乞日繁不可勝紀按永誠以功恩以
德若振罪魁也此祀為不經矣

特賜蔣山寺廣薦佛會

翰林學士宋濂記略洪武四年冬十有二月詔徵江南
高僧十人欽天監擇日於蔣山太平興國禪寺建廣薦
法會上宿齋室却葷肉弗御者一月復勅中書右丞相
汪廣洋左丞相胡惟庸移書城社之神具宣上意俾達
諸冥期以畢集明年春正月辛酉昧爽上服皮弁臨奉
天殿羣臣朝衣左右侍尚寶卿梁子忠啓御撰章奏識
以皇帝之寶上再拜燎香於鑪復再拜躬視疏已授禮
部尚書陶凱凱捧從黃道出午門寘龍輿中備法仗鼓

吹導至蔣山天界總持萬金及蔣山主僧行容率僧伽
千人持香華出迎取疏入大雄殿用梵法從事白而焚
之退閱三藏諸文自辛酉至癸亥止當癸亥日時加申
詣浮屠行祠事已上法駕臨幸雲中雨五色子如豆或
謂婆羅子或謂天華墜地所變上服皮弁搢玉圭上殿
禮佛北嚮立羣臣各衣法服以從和聲即舉麾奏悅佛
之樂首曰善世曲上再拜迎羣臣亦再拜再奏昭信曲
上跪進薰蕕奠幣復再拜樂三奏延慈曲相以悅佛之

舞舞人十其手各有所執或香或燈或珠玉明水或青蓮花冰桃暨名薺衣食之物勢皆低昂應以節上行初獻禮跪進清淨饌史冊祝復再拜亞終二獻同其殊異者不用冊光祿寺卿徐興祖進饌樂四奏曰法喜曲五奏曰禪悅曲舞同三獻已上還大次羣臣退諸僧旋繞佛座演咒梵咒三周以寓攀注之意初斲山石地成六十坎漫以堊至是令軍卒五百負湯實之湯蒸氣成雲諸僧速幽爽入浴焚象衣使其更以彩幢法樂引至三

解脫門每門內五十步築方壇高四尺上升壇東嚮坐侍儀使浦博西嚮跪受詔而出集幽爽而戒飭之詔已引入殿致三佛之禮聽法於徑山禪師宗泐受毗尼戒於天竺法師慧日復引而出命軌範師飯摩伽陀斛法食凡四十九飯已夜將半上復上殿羣臣從如初樂六奏徧應曲執事者徹豆上再拜羣臣從拜七奏妙濟曲上拜送者再羣臣復從拜八奏善成曲上至望位燎已還大次解嚴羣臣超出瀟復跋十四日甲午大風晦雨

雪交作至午忽開霽上悅勅近臣於秦淮河燃水燈萬
枝十五日夜過半竣事還宮隨有佛光五道從東北貫
月燭天良久乃已書之見高帝之於釋門典禮之異如
此

番僧封爵之異

永樂三年封西僧尚師哈里瑪為萬行具足十方最勝
圓覺妙智慧善普應祐國演教如來大寶法王西天大
善自在佛領天下釋教事賜玉印誥命十年封其徒尚

師布扎爾薩巴為萬行圓融妙法最勝真如慧智弘慈廣
澤護國宣教正覺大乘法王西天上善金剛普應大光
明佛餘如前成化中封西僧尚師扎巴嘉勒燦為萬行莊
嚴功德最勝智慧圓明能仁感應顯國光教弘妙大悟
法王西天至善金剛普濟大智慧佛領天下釋教事尚
師即帝師史諱之也按元時贈帝師有皇天之下一人
之上其稱尤異然不云佛而云佛子又其他銜名亦小
簡

道教封爵之異

洪武中封張正常為正一教主嗣漢四十二代天師護
國闡祖通誠崇道弘德大真人領天下道教事宣德封
高道劉淵然為沖虛至道玄妙無為光範衍教莊靖普
濟長春大真人嘉靖封邵元節為清微妙濟守靜脩真
凝玄衍範志默秉誠致一真人禮部尚書兼管朝天顯
靈靈濟三宮總領道教事封陶仲文為神霄紫府闡範
保國弘烈宣教振法通真忠孝秉一真人特進光祿大

夫柱國恭誠伯兼管三宮總領道教事時徽王厚燾遼王憲燁亦自乞封真人授黃金印其印特大於國封之寶

真人得內閣恩典

真人陶仲文以少師一品考六年滿加特進光祿大夫柱國兼支大學士俸蔭一子尚寶司丞

夷王封號之異

永樂封安南國王陳天平降其僭王胡奎曰順化郡公

宣德赦安南黎利其銜曰權署國事正德朝鮮王傳位其弟普城君懌勅封以國王體統行事嘉靖安南莫登庸命降為安南都統從二品銀印

殉葬宮妃之典

英宗遺命止宮妃殉葬此誠千古帝王之盛節而未有能考累朝從殉之人與事者故略記之高皇帝殉葬宮人係建文中追封不可考獨有所謂張鳳李衡趙福張壁汪賓者初以錦衣衛所試百戶散騎帶刀舍人進為

本所千戶百戶永樂初議革建文陞授官員上曰他每
這幾家都是好職事不動通調孝陵衛帶俸世襲至今
人謂之太祖朝天女戶太宗殉葬諸妃考仁廟錄不見
贈諡當是誤遺之耳洪熙元年七月追諡皇庶母仁宗
貴妃郭氏曰恭肅淑妃王氏曰貞惠麗妃王氏曰惠安
順妃譚氏曰恭僖充妃黃氏曰恭靖內郭氏二王氏即
二十二年十月所冊立者也宣德十年八月追贈皇庶
母宣宗惠妃何氏為貴妃諡端靜趙氏為賢妃諡純靜

吳氏為惠妃諡貞順焦氏為淑妃諡莊靜曹氏為敬妃
諡莊順徐氏為順妃諡貞惠袁氏為麗妃諡恭定諸氏
為恭妃諡貞靜李氏為充妃諡恭順何氏為成妃諡肅
僖其冊辭曰茲委身而蹈義隨龍馭以上賓宜薦徽稱
用彰節行又考正統四年六月周憲王有燬薨無子乙
酉上貽書王弟祥符王有燾令其自妃夫人以下不必
從死年少有父母各遣歸其家又十日乙未憲王府以
王正室華氏等死殉事聞賜諡貞烈贈夫人施氏歐氏

韓氏陳氏張氏李氏俱賜諡貞順贈夫人予祭及葬用
一品禮未及聞上命故也當是時帝甫十三而有此書
其止殉張本哉至成化四年遼王豪城上言嫡長子恩
鰠夭亡子欲以其婦馮氏妾曹氏殉上貽書切責之令
移其婦妾於宮中供養如法毋使失所然二十二年寧
河康僖王卒宮人王氏楊氏張氏段氏俱自盡俱贈夫
人賜祭及葬蓋上以其節烈而旌之不知其亦從殉也
嗚呼英廟之仁澤遠且大矣

誅公侯二特詔

國朝誅勲臣大將如藍玉輩俱無詔示天下其頒詔者
僅忠國公石亨太傅咸寧侯仇鸞而已今記於後天順
四年二月初四日詔曰朕惟有功者必賞有罪者必罰
此古昔帝王馭世之要道我祖宗垂統之成法也朕遵
之而豈敢有私且如犯人石亨拔自下僚薦歷封爵暨
朕順天應人以復大位而亨適逢其會掩以為功朕于
時信之不疑爵以上公寵以甲第金帛之賚莫與為比

崇報之厚亦已極矣豈期石亨貌若忠厚心實狡險作威作福黷貨無厭欺壓諸司賣官鬻獄縱姪石彪肆為兇逆暗結人心圖謀鎮守法司論亨罪當連坐朕念其微勞累次寬宥特令閒住以保全之亨乃不知感悟怨謗多端包藏禍心潛謀不軌幸而天地不容事乃發露文武大臣僉謂石亨罪大惡極不可再赦朕不得已置之於法書不云乎自作孽不可活朕雖欲曲為保全豈可得哉爾文武羣臣繼今以後宜用為戒毋怙恩以違

大義然石亨所犯乃其自取於衆無預除將親識情熟
之人發遣外其餘頭目人等曾出入門下者悉置免究
爾等尚其同心同德勉輔我邦家欽哉故諭嘉靖三十
一年九月初四日詔曰朕嗣守丕基法祖圖治比因邊
境靡寧思欲選將練兵以為攘外安內之計二十九年
敵入犯京畿賊臣仇鸞自大同擁兵入衛要以為功朕
非不識姑試用之付以京營戎政之任假之寵異冀其
感恩改善為朕討寇詎意此逆懷蓄異志欺誑朕躬背

叛朝廷通敵結好求箭毒為號臨陣不與廝殺二年之間一卒不練迹其所為唯欲合謀乘釁志圖匪細大逆不道罪深惡極天地不容神人共憤彼身先殛死事尋敗露已將通敵人犯勾引情跡鞠審得實逆鸞仍劈棺提尸斬首九邊梟示併各犯家屬人等明正典刑朕思此逆外假忠名中藏禍心非朕燭其險詐伐其逆謀幾何不蹈宋巨奸之所為者惟上天賜佑宗社有靈滅此禍本以安邦家即擇吉遣官恭行奏謝南北郊告謝太

廟社稷先聖帝王特茲詔示於戲瘳惡伐罪國家之憲
典具存福善禍淫天道之鑒臨不爽播告天下咸使聞
知

罷輔臣特勅

國朝內閣輔臣罷任多以禮待其重而削奪者亦不過
於批旨內行遣而已嘉靖中寵任之極無過於張夏而二
公罷相皆有勅諭羣臣八年八月十五日諭朕本藩服
以我皇兄武宗毅皇帝青宮未建上賓之日遺詔命朕

入繼大統以奉天地社稷之祀君主臣民當是時楊廷和等懷貪天之功襲用宋濮安懿王之陋事以朕比擬英宗毒離父子之親敗亂天倫之正朕方在沖年蒙昧致彼愈為欺侮其時幸賴皇天垂鑒祖宗默佑以今輔臣張璉首倡正議忘身捐命不下鋒鏑之間後遂致人倫潰而復叙父子散而復完厥功具載莫可泯遠朕念璉等忠於王事授以重職擢居輔導欲其全君臣始終之義之美奈何璉等自居官以來不思圖終之難頓忘謹

始之志自用自恣負君負國所為事端昭然衆見而桂
萼尤甚近以言官屢劾朕不敢私論法本當置諸刑典
特從寬貸璵令還家愴悟以資後用萼奪其散官併學
士職銜回籍致仕其餘黨分別區處庶幾仁之中義之
公兩盡焉又照給事中孫應奎王準陸粲居言官之列
有耳目之寄既知大臣若斯却乃坐觀至此方行舉劾
實非忠愛之本心亦負朝廷之委任者也應奎首為進
言姑免究陸粲已究外王準也著法司提了問茲特諭

爾文武羣臣庶令咸知朕意其璫等既已處置了他每
罪固不可掩而功尤不可掩內外大小官員軍民人等
不許乘此挾私讐奏擾敢有違的決行重治不宥尚賴
文武羣臣協力同心匡朕不逮凡近日所行事務有未
當者都著條奏更正可行的不許一槩混開勿得固上
縱私效倣為事事或敗露法典具在必罪治之爾禮部
便轉行都察院刻布天下悉使知之故諭十年月日勅
諭三法司薛侃以猖狂之性發不諱之言據其言似忠

謀遠慮但朕非宋仁宗向暮之年原其心實懷欺罔忍於言君終無建嗣之期妄生異議致惹事端法司擬罪來看彭澤質非有用性本無良小人狡詐之資奸邪譎詭之行往來搆禍搬弄是非致薛侃招稱有干宗室傷朕親親之情俾輔臣急於攻擊害朕君臣之義罪犯深重法當處死姑從寬宥發邊遠地面充軍輔臣張亨敬初以建言大禮朕特不次進用既而被人彈劾有旨令其省改却乃不慎於思罔悛於性朕心腹是托奚止股

肱而已望以伊傅之任豈惟待遇是隆乃昧休休有容之量犯戚戚媚嫉之科殊非朕所倚賴專於忌惡甚失丞弼之任難以優從著致仕去夏言既於斯事無干不合拍案喧罵匪徒失儀亦涉爭報念其被害所激赦而不問孫應奎曹汴職在糾舉豈責彼言但其時事未明白遽斥輔臣跡涉回護故朕併令拿問今念係言官亦從赦放其餘見監人犯悉宥之此事既經區處爾在朝大小官員宜思革除私忿務為盡忠效古人事君同寅

協恭之心守聖人事君不貳不欺之訓匡朕不逮以臻
至化庶不負其君忝其親永有譽聞二十一年六月朔
之次日手勅諭都察院近日人事愆違天垂仁愛雨澤
方至禾茂民康今雨下竟朝矣丞弼之臣宜忠敬清亮
者居之故曰變理調和之職也朕承皇天眷命以神王
二道裁理天下非求仙用夷荒昧之為止是一早朝終
始不一耳然君逸臣勞務本抑末失小顧大先賢用之
朕雖失此早一臨門視多命攝愛此身儉是父母遺我

者宗禮帝神加志天下不曾色荒聲迷於不省人事之地無一時不思天下付民上賴為人君之職所當懼者奈何世降人浮求一人才夾輔卒不可得昨夏言測東宮遷移無故稱改慈慶為東宮府夫廢母后備制以縱奉子朕必不為言前稱朕意為正馭郭勛為非今何一用勛言若今謂為忠正前亦忠正前謂為非則今亦非也夫嫉人賢已必欲美皆已出惡亦無歸夫何謂郭勛以不領勅下獄矣猶千羅百織如何自擬君旨謂不必

用勅言官係朝廷耳目一犬不如專一聽受主使逆君
沽譽傾人取位以奉所悅或戕人一家以代報復吁是
人為乎又凡工作例有內官監官昨撰大享殿興工何
無高忠勅稿前歲忠代言進玉器祝壽朕已疑其與彼
同計矣今果通泄朕言不具勅稿果無例耶果不通謀
耶昨又聞乘轎苑中次日朕以香葉束髮巾用皮帛鞋
以便跪起彼謂不可夫無賜而自乘擅也有命而抗違
非禮也且朕不早朝彼亦不入內閣軍國重事徑自私

家而專裁之王言要密豈宜人臣視如戲具如此大事
言官豈無一人知見不聞一言片疏糾發徒知欺謗君
主弄法舞文排擠忠直貪生媚竈今日神鬼皆怒雨甚
傷禾卿等布諭俾中外知之時言待罪於家又十五日
降口宣召入拜皇考諱辰御仍直候內苑禮成言具疏
謝罪留中至七月朔始奉御批言始因朕諭字敬令上
疏論郊禮漸階寵用出羣臣之首累次放恣欺慢全無
警懼面諛退誹深負朕恩遇優禮之甚屬當日食太重

正坐下慢上之咎令革職閒住已乃降勅諭禮部曰今日仰天心下眷本朕不才累及太陽正坐臣子欺逼君父外陰侵犯內陽之咎夫太子者有臣道焉豈可居母位以匹父是一失即當退處本位夏言以臣欺凌君上作威作福不下郭勛之罪但卿五六年累年供事內苑贊誠左右獨因此切軫朕心故免死去之用仰承天戒是二失中華陽外夷陰今陰犯陽若蹈荒原可見此時內外臣工通不愛民如身視國如家是三失若是三咎

厥災甚大伏荷皇天降示朕丕感弗勝即於明日為始
修省三月初五日躬祇告於玄極殿內外大小百工宜
各洗淨乃心脩舉乃職目擊戎務為急司其事者盡心
圖濟用保吾民禮部刊刻頒布天下敬哉敬哉

詳夏之得罪每以偃蹇傲惰見咎而迄不知省以至敗
如十八年五月己巳先是上幸大峪山閱視陵工內閣以
居守勅稿進覽遲緩上不悅因責輔臣夏言欺慢狀言具
疏引罪上大怒曰言自微官朕命張孚敬示令建贊郊

禮之儀遂不次進官其所倚任皆朝廷恩眷自當益勵
公勤盡忠事主乃每每怠慢不恭昨所選擬官僚多不
稱用密疏既不遵式却借封皮以便私情既不遵奉原
賜印記并歷年諭帖可即進繳御前雖無稿其數尚可
查考無得隱匿取罪宜痛自省改以供職業言復自陳
臣一介凡庸遭逢聖明在上追惟郊禮之議雖小有論
贊實首發自淵衷成以睿斷臣實何知何能遂蒙顯拔
不次進用臣非犬馬草木敢不思感恩圖報於萬一昨

扈從南巡偶以疾昏迷時典禮方殷因勉強赴閣供事
至於錄進舊文併謾居守勅稿既失稽遲而密疏之陳
又屢違欽式不意聖度優弘勉之省改使得自新臣於
此惟有感激流涕痛自悔省而已復欽奉聖諭令以原
賜印記并歷年諭帖進繳臣於恐懼待罪之餘尚有意
外祈恩之望蓋印記之文乃特賜嘉獎聖諭諸帖皆親
灑宸翰比隆於典謨訓誥已編之御集當傳之萬世惟
是臣之家藏實臣一時遭際之榮為子孫百世之寶今

一旦追取臣忍舍之伏望重加矜念仍以賜臣或別加
罰治則臣死且不朽矣疏入上曰言既實君命手澤可
見其實有旨追取數日不繳必有殘壞禮部即取進繳
姑念昔日贊議郊典革其勛階少師官職其以少保兼
尚書學士致仕言乃檢手勅諭帖自嘉靖九年起至十
八年共四百餘道為十二匣銀印記一顆具疏上之上
諭吏部閣臣夏言初出朕簡用首因奉示建贊北郊茲
典至大言知之真正克贊成之朕嘗曰昔乎敬為網常

立論正吾父子之名言不忌禍患能贊吾復皇祖初禮
二臣於我有助不意言以情慢之資超進丞弼之任身
居是位猶不警勵昨已令去之然朕復念言建助大儀
力贊陵議復他少傅兼太子太傅禮部尚書武英殿大
學士還閣辦事贊終喪禮宜省思盡忠未可怨尤君上
也即日任事初言既罷政將行詣闕辭上遣司禮官止
之命還家候旨隨降是諭言即進閣上疏謝上報曰覽
卿已起閣朕知悅已卿宜益勵初忠盡心輔政事秉公

持正不惟副朕任亦免衆忿也卿其思之言復疏謝且
言自處不敢後於他人一志孤立為衆所忌上覽之不
悅隨詰責之并殊塗疏中洗改字數處言乃惶恐引罪
得旨報聞亡何上以奉先殿雷震召大學士夏言顧鼎
臣往視時晷已移辰矣而言等尚未入政府上不悅曰
輔臣朕所憑倚恣逸若是何以表率羣工命禮部劾之
言等請罪上曰朕每寬言過非為言為左右義重也言
乃滋傲惰成性蔑不知儆其何以表率百僚鼎臣亦相

效既已知罪姑宥之自後諸司敢踵過蹈非者禮部都察院叅奏相黨護者連坐十九年五月始給還進繳御札四百三道銀印一刻手勅一道二十年八月言久疾在告上以慈壽晏駕皇太子服制議示言具疏對誤寫字號被旨切責令從實陳狀言引咎謝罪并乞假還鄉治疾上怒曰言初以言職朕命孚敬傳示令上言郊禮自是異擢崇遷眷出羣臣上何肆意放恣一至於此茲方廟災修省之初皇伯母大喪之際邊圉未靖屬主憂之

時乃罔思體念居出任意病已將平敢於求逸大負倚
注本當遣問第念往勞落職令致仕去因盡削其階勛
職秩止令以禮書帶武英殿學而已言初測知上怒奏
備邊事宜上答曰言既蘊忠謀何乃堅於自愛負朕眷
倚姑不究又五日為九月朔諭禮部今古異時縱孔子
生未必不與我同朕自十三年受病重咳六十日餘昨
冬復得奇疾非熱非寒卧三旬乃起早朝遂廢百司盡
怠不知君父本心非放恣聲色大抵生長南方多脆非

北地比奈夏言首輔先懈羣臣效尤姑令罷去今在位者務思忠勞之實勿慢天欺君曠職自肆又六日壬辰言入詣迎和門辭賜酒饌無逸殿仍令還私宅調理以俟後命至十月丁卯一月餘乃詔以少傅太子太師禮部尚書武英大學士赴閣仍賜假調理令於十一月廷謝履任至壬寅之詔凡三褫矣戊申兵部議三邊侍郎曾銑復河套疏上上以言主議銜之下問內閣露意大學士嚴嵩遂攻言上批謂言於銑疏初至時乃密疏稱

人臣未有如銑忠者朕已燭其私但知肆其所為不顧國安危民生死惟徇曾銑之欲云云言懼自辨上批答爾等朝廷倚政之本百爾自宜先以邦民為心如何專徇私情強君協衆昔密奏未允乃詐稱上意必行茲所奏又無引罪詞吏禮二部會都察院叅看以聞部院叅言事惟任意跡涉強君上曰爾等奉旨議奏猶謂跡涉此非媚即畏是何臣體姑不究夏言削奪餘官以尚書致仕尋捕曾銑子淳及言婦翁下獄得其交通事狀詔

夏言著錦衣衛差官校逮繫來京問三法司謂言法固當斬以直侍多年效有勞勩據律有議能議貴之條請自上裁上怒曰爾等任曰執法豈不知恩威當自上出乃敢借意朋護朕視言為腹心言則視君為何方銑疏上時即密奏強君朕何嘗一言諭答敢動稱有密諭主行及事敗止令致仕又不知引罪故作怨語曰前去因不帶香巾為朝廷計非以身家是人臣禮歟彼正以西內二三月直候不得見蘇綱為辭爾等又為言直侍內

苑堅恣朋護之私是何法理其更擬奏遂同銑原坐交
結近侍官員紊亂朝政律斬妻子流三千里及秋竟不免
隆慶六年六月日皇后懿旨皇貴妃令旨皇帝聖旨
說與內閣五府六部等衙門官員大行皇帝賓天先一
日召內閣三臣在御榻前同我母子三人親受遺囑說
東宮年小要爾們輔佐今有大學士高拱專權擅政朝
廷威福都強奪自專通不許皇帝主管不知他要何為
我母子三人驚懼不寧高拱便著回籍閒住不許停留

你每大臣受國家厚恩當思竭忠報主如何只阿附權臣蔑視幼主姑且不完今後都要洗心滌慮用心辦事如再有這等的處以典刑

弇山堂別集卷十五

欽定四庫全書

弇山堂別集卷十六

明 王世貞 撰

奇事述叙

余既有異典盛事二述矣異典者遘之自人主者也盛事者遘之自天者也盛事之遘無非媿已異典之遘媿居十九疵亦居一已乃復有遘之自天而不可言盛遘之自人而不可言典或人與事之巧相符者或絕相悖

者為其稍奇而不忍遺之別錄成卷以備虞初春明之一采故不敢稱稗史也

奇事述一

再登大位

英宗以正統己巳北狩居塞外者一年還稱太上皇居深宮者七年以丁丑復辟復稱皇帝者八年凡再即大位再紀元一稱太上皇崇卑顯晦更遞嘗之千古所無再立東宮

憲宗以正統己巳冊為皇太子景泰壬申降封沂王天
順壬午復冊為皇太子凡再錫名三膺冊一為親王再
正青宮近代所無

魯府二事

魯荒王太祖第十子封一歲而王王二十年而卒以卒
之歲生一子曰靖王有賢名在位六十四年壽七十九
嘉靖末郡王見在十餘位將軍以下至中尉及未名者
四百餘位王女亦數百人此一奇也荒王聰敏好學蚤

卒高帝以其好內服丹而諡之荒最後端王名麗丹書其淫虐之狀聞天下而諡之端此亦奇也

國封相同

三吳王高帝初封時已與張士誠同至洪武初復封周定王建文初復封允熲

兩徐王洪武初贈太后父馬公建文初封允熲

兩漢王洪武中肅莊王初封永樂初封高煦

兩趙王洪武初封杞薨永樂初封簡王

兩衡王建文初封允熲成化中封恭王

兩榮王景泰中德莊王初封成化中封莊王

兩衛王洪武中遼簡王初封洪熙封恭王

兩高唐王一德府厚燭一衡府厚煥

兩汝南王俱周府一削爵有燉一子埊

兩棗陽王一襄府初鉦一代府成鈺

兩寧陽王一衡府載塢一正德贈張懋

兩東甌王一魯府當泚一國初贈湯和

兩寧河王一晉府美瑍一國初贈鄧愈

兩齊東王一漢府瞻坪一衡府厚炳

兩昌樂王一漢府瞻坪一衡府載堽

兩德平王一瀋府睂樅一徽府載堽

封爵相同

兩信國公吳元年徐達洪武湯和

三定遠侯洪武王弼天順石彪嘉靖鄧繼坤

兩懷遠侯洪武曹興嘉靖常玄振

兩保定侯永樂孟善天順梁珪

兩安平侯永樂李遠嘉靖方銳

兩武清侯景泰石亨萬厯李偉

兩新建伯永樂李玉嘉靖王守仁

兩忠勤伯洪武汪廣洋洪熙李賢

兩順義伯洪熙元年金順成化二年羅秉忠

兩安平伯李遠子安方銳子承裕

兩惠安伯永樂金玉宣德張昇

兩武清伯景泰石亨隆慶李偉

兩寧遠伯景泰任禮萬厯李成梁

兩黔國公為沐晟吳復一封一贈

兩潁國公為傅友德楊洪一封一贈

兩涼國公為藍玉吳瑾一封一贈

兩昌國公為張巒及巒子鶴齡一封一贈

贈爵相同

三涇國公永樂陳亨天順陳瀛正德周能

兩鄖國公洪武廖永安正統張信

兩蘄國公洪武康茂才康鐸父子各以功贈

兩蔡國公洪武張德勝永樂徐忠

兩滕國公洪武顧時永樂孟善

兩沂國公洪武金朝興永樂袁容

兩漳國公永樂王聰正統鄭亨

兩安國公天順孫忠萬厯李偉

兩榮國公永樂姚廣孝及張玉初贈

三高陽侯俱洪武李信李志高李繼先贈同姓尤奇
兩東海侯俱洪武徐公輔陳文贈

王公國封相同

高皇帝初建十王如秦晉燕周楚齊蜀魯六公如魏韓
宋衛之類皆大國蓋不欲相犯也而其後有不能盡然
者豈勢耶抑當事者不能詳考耶

太祖初封豫即代簡王又為公俞通海贈國

封郢靖王又為公馮國用贈國

封韓獻王又為公李善長封國

初封衛王即遼簡王又為公鄧愈封國

仁宗封梁莊王又為公胡顯封國

滕懷王又為公顧時贈國

衛恭王又為公鄧愈封國

贈寧國公王真又為獻王封國

英宗封許悼王又為公王志贈國

贈安國公孫忠又為惠王封國

景帝初封沂王即憲宗又為公金朝興袁容贈國

初封榮王即德莊王又為公張玉姚廣孝贈國

憲宗贈寧國公陳瀛又為獻王封國

孝宗贈寧國公周能又為獻王封國

封涇簡王又為公陳亨蔣貴贈國

世宗初封裕王即穆宗又為公張軫贈國

封景王又為公李讓贈國

贈潁殤王又為公傅友德封國

今上初封潞王又為公張武贈國

王侯郡邑相同

高祖封六安王轉兒又為侯王志邑

封江夏王孟炬又為侯周德興邑

封臨淮王興祖又為侯李性邑

太宗封宣寧王遜炆又為侯曹良臣邑

封昌化王仕燁又為伯邵喜邑

宣宗封湯陰王祁鎬又為伯郭資贈邑

封潁川王子墟又為侯傅友德邑

英宗封平鄉王祁總又為伯陳懷邑

封永城王載圻又為侯薛顯邑

憲宗封順昌王見濤又為伯王佐邑

封安昌王膺鋪又為伯錢承宗邑

武宗追封寧陽王張懋又為侯陳懋邑

世宗封新寧王鼎鈞又為伯譚忠邑

封新昌王盤炷又為伯唐雲邑

封慶陽王謨塾又為伯夏儒邑

封會昌王弼棟又為侯孫繼宗邑

封德平王胤璇又為伯李銘邑

封新昌王厚燝又為伯唐雲邑

封慶雲王厚燦又為侯周壽邑

封惠安王厚煦又為伯金玉張昇邑

穆宗封保定王珪坦又為侯孟善梁瑄邑

今上追封定襄王朱希忠又為伯郭登邑

大臣姓名同

五張信一永樂隆平侯一弘治彭城伯一宣德兵部左侍郎又洪武有狀元侍讀及孝子尚寶卿

四張泰正德二人一以南右都為戶部尚書一為總制右都御史俱贈太子少保成化二人一至都督同知為名將一任翰林修撰為名文人

三王真一洪武都指揮使追封臨沂侯一永樂金鄉侯追封寧國公復有都督同知為遼東總兵

三吳良一洪武江陰侯一正統都督同知一成化都督同知

三李敏一洪武工部尚書一景泰戶部尚書一成化戶部尚書

三石璞一洪武右侍郎一永樂由御史至按察使一宣德由御史至景泰為太子太保兵部尚書

三劉璋俱弘治一太子少保工部尚書一右副都御史一都督同知

三王榮俱景泰一南京太僕卿一大理少卿後復姓趙
至尚書一都督僉事

三李瑾一成化太子太傅襄城侯一正德都督僉事一
嘉靖征西前將軍都督僉事

三李浩一洪武刑部侍郎一景泰南京工部右侍郎一
成化禮部尚書

四張鳳一洪武行中書省叅政一天順戶部尚書一正
德右副都御史一嘉靖總督宣大偏保右都督

三李賢一永樂忠勤伯一宣德豐城侯一成化少保大學士

三王佐一永樂順昌伯一正統戶部尚書一正德南京工部尚書

三張瓚成化二人一戶侍郎一襲封惠安伯嘉靖一人少保兵尚書

四王綸俱正德俱有才名其二人同歲為副都御史一撫湖廣一撫大同一以御史遷按察副使一至江西右

叅政名甚盛而為寧王偽尚書伏法

三白玉成化二人一右都督一都督僉事正德一人右都督

兩汪同俱洪武一吏部侍郎一都督同知興祖初名

兩郭子興一高帝舊帥滁陽王一洪武中鞏昌侯

兩朱榮一洪武一永樂俱都督

兩李素一洪武御史中丞一洪熙右副都御史

兩黃琛一洪武駙馬都尉中都正留守一成化南京戶

部右侍郎

兩吳禎一洪武靖海侯一成化都御史

兩趙新一洪武山西右布政使一景泰吏部尚書

三劉寧一洪武一成化俱都督一嘉靖右都督

兩陳文一洪武都督僉事東海孝勇侯一成化大學士

莊靖公

兩王博俱洪武一中書平章政事一廣東右叅政

兩王平一洪武右都御史一永樂交趾右布政使前右

僉都

兩李泰一洪武戶部尚書一成化詹事府詹事兼學士

兩陳清一洪武都督封合浦侯一弘治南京工部尚書

兩金忠俱永樂一兵部尚書贈少師一太保封忠勇王

兩陳亨俱永樂一右都督追封涇國公一左都督贈封

成武伯

兩張興俱永樂靖難功臣一都督僉事一安鄉伯

兩蔣驥一永樂禮部尚書一弘治定西侯

兩陳壽一永樂工部左侍郎贈尚書一正德南京刑部

右侍郎以致仕進刑部尚書俱有諡名德亦相類

兩陳瑛一永樂左都御史一正德都督同知

兩吳江一永樂總兵一弘治總兵

兩李英俱宣德一達官會寧伯一都督同知

兩陳智一宣德榮昌伯一正統右都御史

兩劉昭一宣德都督一成化太子少保戶部尚書

兩劉璉一宣德戶部左侍郎一成化太僕寺卿

兩張本一宣德太子賓客兵部尚書一弘治都察院右

副都御史

兩程富一宣德由教授陞御史至尚書一正統由布政

司檢校陞提學御史至僉事

兩顧佐一宣德掌都察院事右都御史一正德初戶部

尚書贈太子太保

兩張駿一宣德都御史一正德工部尚書直文淵閣
兩張昇一宣德惠安伯一弘治太子太保禮部尚書
兩張杲一正統彭城伯一天順太平侯

兩張輔俱正統一嗣封彭城伯一太師英國公

兩宋傑俱景泰一西寧侯一右副都御史

兩劉清一景泰刑部右侍郎一成化總兵右都督

兩王通一景泰都督同知前成山侯一弘治右都督

兩李錫一景泰太子少保通政使一隆慶總兵官都督
同知

兩劉聚一景泰左都督一成化左都督寧晉伯

兩韓福一景泰左副都御史一正德戶部左侍郎

兩李棠一景泰刑部左侍郎一隆慶南京吏部右侍郎
郎

兩楊鼎俱景泰一為山西左布政一為戶部侍郎後至
尚書

兩趙榮俱天順一忻城伯一工部尚書

兩陸欽俱榜眼一天順甲申一正德辛巳二科俱非正
歲而相去僅踰一甲子

兩李文俱成化一高陽伯一都督同知

兩李震俱成化一興寧伯一兵部左侍郎

兩吳琮俱成化一襲廣義伯一襲清平伯

兩張鵬俱成化一太子少保兵部尚書一都督僉事

兩王信俱成化俱都督同知

兩吳節俱成化一太常卿兼翰林院侍讀學士一都察院右副都御史

兩馬昂一成化太子少保戶部尚書一正德左都督兩李和一成化南京戶部右侍郎一嘉靖駙馬都尉兩毛倫一成化左都督一弘治通政司通政使

兩李本一成化南京禮部尚書一嘉靖少傅大學士兩呂本一洪武吏部尚書建文外大父懿文太子妃父也一即李本改姓

兩韓文俱弘治俱字貫道一都察院右副都御史一戶部尚書

兩徐溥俱弘治一永康侯一少師大學士

兩王道一弘治都察院右副都御史一嘉靖吏部右侍郎

兩劉忠一弘治右副都御史一正德少傅吏部尚書武英殿大學士

兩張海一弘治兵部左侍郎一正德都督同知

兩謝綬一弘治南京禮部尚書一正德右副都御史

兩王憲一正德襲封靖遠伯一嘉靖太子太保兵部尚

書

兩張縉一正德南京戶部尚書一嘉靖都察院右副都

御史

兩許國一正德左都督一萬歷少保武英殿大學士

兩彭澤俱嘉靖一少保兵部尚書一太常寺卿

兩陳儒俱嘉靖一泰寧侯一都察院右都御史

兩胡松俱嘉靖一工部尚書一吏部尚書

兩吳山俱嘉靖一刑部尚書一少保禮部尚書

兩孫應奎俱嘉靖一戶部尚書一都察院右副都御史
又相繼為給事中以言事貶

兩張岳一嘉靖一萬厯俱侍郎

兩劉文俱嘉靖一都督同知一寧晉伯

兩陳璋俱嘉靖一刑部左侍郎一工部左侍郎掌鴻臚

寺

兩劉璽俱嘉靖一都督僉事山西總兵一宣府巡撫副都御史

兩何鰲俱嘉靖左布政使其一至刑部尚書

兩張鎬俱嘉靖一副都御史一僉都御史

兩陳瓚俱隆慶三年同時一光祿卿後為左都御史一太常少卿後為刑部左侍郎

兩陳于陞萬曆十八年一為詹事學士一為左副都御史班正聯立

成化間萬通奴錦衣指揮徐達與中山王同

英國公張輔彭城伯張昺同為勲戚重臣朝夕共事而
昺名其子曰輔與英國公同尤不可曉

正德中太師鎮國公朱壽者蓋上所托名也然國初亦
自有舳艫侯朱壽

國初會稽縣知縣鄒魯以政最入為大理寺丞弘治中
御史鄒魯當遷大理寺丞不得恨刑部尚書何喬新薦
其郎中奪之劾喬新謫山陰縣知縣山會皆紹興附郭

縣也

宣德初命工部尚書黃福冊兵馬副指揮黃福女為郡王妃上好竒多戲或有意為之也

景泰初翰林院修撰王振恥與太監振同名請改為恂景泰末司禮太監張永與于少保同禍而正德中司禮太監張永誅逆有名相去正一甲子俱嘗總督十二營成化間妖人千戶王臣僂於市翰林侍講學士王臣恥與同名上疏請更之不許

正德末江西按察副使副總兵都督僉事俱張祐按張祐為兵備時與總兵同事有功後一至都督同知一至布政使尚同事

正德末御馬監太監張忠同監督團營軍務至嘉靖初以罪革貶而藩邸中貴張忠亦陞御馬監太監代領團營不知者以為一人也

金吾左衛指揮使楊善自陳景泰間從事尚膳監凡聞內臣密謀必達於忠國公石亨上自沙漠還南內皇太

后時時來省王誠舒良欲留錮之臣得其謀以達內臣
劉成啓太后遂不至詔進一官為都指揮僉事是時與
興濟伯為兩楊善同預奪門者也

同年一榜同姓名者多不可紀余所知辛丑有兩張洽
俱浙江人丁未有兩林一新俱福建人乙丑有兩陳王
道俱吾鄉人每投刺以邑里自別兩林又同為戶部主
事以至員外郎郎中僉事叅議副使俱同其一林始卒
而一林仕至布政使又景泰及嘉靖初俱有吏科給事

中毛玉俱利口言事官俱不甚顯

成化中有兩王濬同時為監察御史其一以掌院威寧伯王越薦超拜右僉都御史其一坐累出知山西石城縣以發落誤語累殺強盜家屬多為西廠所發凌遲處死于市

正德十二年吏科論劾四川巡撫都御史馬昊兵科論劾守備都指揮亦馬昊同日報聞

嘉靖中刑部郎中徐學詩兵部主事徐學詩俱有聲郎

署間後兵部改名曰學謨賁至禮部尚書刑部以論列大相為民後起南通政叅議尋卒贈大理寺右少卿嘉靖丁未以後連三科有李春芳其一狀元少師一至知府一至左給事中

王三錫王三接同名者至多而官皆不甚顯不能踰方面余族人有之崐山陳王道與陳王道同舉進士年亦相若而一止南道御史一止工部員外郎其官皆失於庚辰春萬歷十一年中御史有兩李植封事傳遠近不

能辨

嘉靖兩廣總督尚書蔡經又副總兵都督僉事張經成功後蔡經復張姓同

余嘗於古跡中見洪武有周鼎字伯器而正統亦有周鼎字伯器俱博雅有文名前後幾不可辨

父子同名

古有父子同名余嘗記之矣國朝唯劉忠武侯事尤異忠武父名江為戍卒死忠武仍其父名不易累戰功至

左都督佩大將軍印猶與其父同名後封廣寧伯始更
名榮封未幾而卒

叔姪名位事體相同

潘珍與從子旦壬戌乙丑登第珍以兵左侍理部事旦
以兵左侍督兩廣同歲議安南忤旨歸珍戊申卒年七
十二贈右都御史旦己酉卒年七十四贈尚書

兄弟名位事體相同

許誥許讚皆吏部尚書進子以避父嫌同日誥由給事

中改翰林檢討讚由御史改編修後復以父累同日外
謫詰為判官讚為知縣尋再起累官詰為南戶部尚書
讚為戶部尚書中間詰由九列一轉翰林侍讀學士讚
最後自太宰為文淵閣大學士

張禴張禴兄弟也其年事科第俱相近正德中禴以刑
部郎中禴以刑科都給事中俱改御史查盤禴遷太僕少
卿遂轉僉都御史禴為大理寺丞逆瑾敗俱為言官所
劾禴謫禴無恙後禴累官至右副都御史禴亦累遷舊

官以卒郎中都給事改御史非故事也而禰禮兄弟以一時得之亦甚異矣

吳良吳禎俱以老成為將少汗馬勞為高帝所重良封江陰侯追封江國公禎封靖海侯追封海國公俱特進光祿大夫良上柱國禎左柱國中間良以指揮使入都督僉事遂封侯禎以侯一出領指揮使

詹許父子

國初詹同以翰林院承旨兼吏部尚書綰二綬蓋侍從

與六卿之長也其子徽以吏部尚書兼左都御史亦綰
二綬蓋六卿三法司之長也後許進與子讚俱為吏部
尚書復與子論俱為兵部尚書蓋盛之極而奇者也

吳聘君父子

吳聘君與弼之父溥俱有文學行誼溥會試第一廷試
二甲第一授翰林編修歷官三十餘年僅至國子司業
六品年六十八而卒與弼居田間不仕年六十八召至
京即授左春坊左諭德五品又聘君名滿天下而溥以

會元高第人不知之如王文成守仁之父華以狀元至太宰而人亦知有文成而不知華也

學生子同顯

孟麟孟鳳者初臧姓王楠王楊者皆學生而麟至右布政使鳳至尚書內外二品楠至南鴻臚卿楊至右布政使官序略相當又戊午舉人顧合璧聯璧其父四舉胎八子與周八士同

二相公子科第

嘉靖甲辰翟文懿鑾居首揆二子試中書舍人汝儉貢
士汝孝俱登第當讀卷上疑之為啓封則汝孝果在首
甲汝儉亦進呈因而抑之後給事中王交等言其弊上
大怒勒文懿死汝儉汝孝俱除名萬厯丁丑江陵公首
揆次子嗣修登第既進呈上亦啓封特擢為第二人庚
辰叔子懋修復登第進呈上復啓封特擢為第一人而
伯子敬修亦前列所遇之不同乃爾其後俱削籍却同
二死節同月日

正德江西按察副使周憲死寇難其子死之嘉靖江西按察副使汪一中死寇難其妻亦死之同以閏六月二十六日俱贈官賜祠以節孝配享

二陳中宮父

世宗中宮皇后陳氏父萬言起諸生封泰和伯穆宗中宮皇后陳氏父景行起諸生封固安伯而后皆無子後卒俱贈太子太保

山西二國戚

嘉靖壬辰第一甲第二人孔天胤以國戚授陝西按察
僉事遷提學副使至右布政使丁未第二甲第一人亢
思謙改庶吉士授編修國戚事始覺得遷提學副使至
右布政使皆以不得意功名去官皆晉人皆有詩文名
豪飲喜客相甲乙

正德萬厯三相

高少師拱病榻遺言謂萬厯改元謀欲去司禮太監馮
保而張少師居正為次輔與保善第三輔高宮保儀言

天道六十年一周正德初劉少師健與謝少傅遷謀去
司禮太監而次輔李少師東陽泄之瑾劉謝俱不勝罷
去蓋劉與高皆河南人李張皆湖廣人而謝與宮保皆
浙江人也俄高少師逐宮保尋卒張亦獨留異哉

常熟二祭酒

弘治辛亥李傑世賢以左庶子脩實錄將完陞南京國
子祭酒奏成加俸一級萬歷丁亥趙用賢汝師以右庶
子修會典將完陞南京國子監祭酒奏成加俸一級二

公皆常熟人相去垂百年事體無一不同者

南北大臣之異

偶閱丁亥夏縉紳便覽見六部尚書吏部為楊公魏山
東海豐人戶部為宋公纁河南商丘人禮部為沈公鯉
河南歸德人兵部為王公一鶚直隸曲周人刑部為李
公世達陝西涇陽人工部為石公星直隸東明人蓋皆
北人也又通政司張公孟男河南中牟人大理寺為賈
三近山東嶧縣人蓋皆北人也惟都察院左都御史吳

公時來浙江人然二月前為辛公自脩又河南襄城人而總督倉場左侍郎為胡公執禮陝西永昌人戎政尚書傅公希摯直隸衡水人又皆北人也至於內閣大學士中極殿則申公時行直隸吳縣人建極殿許公國直隸歙縣人武英殿王公錫爵直隸太倉人詹事府掌府少詹事趙公志皋浙江蘭溪人翰林院掌院詹事兼學士徐公顯卿直隸長洲人教習庶吉士吏侍兼學士朱公賡浙江山陰人禮侍兼學士張公位江西南昌人南

院掌院諭德習公孔教江西廬陵人國子祭酒田公一雋福建大田人南國子祭酒趙公用賢直隸常熟人皆南人也其南北人之異任蓋自古所無者

兩年來南京六部尚書兵部楊公成吏部陸公光祖禮部王公弘誨工部李公輔都察院耿公定向刑部則世貞通政司則余公懋學大理卿張公櫟侍郎吏部則趙公志皋戶部則顧公養謙禮部則趙公用賢兵部則王公用汲刑部則朱公天球亦皆南人

弇山堂別集卷十六